



UKA 2013/44  
14. november 2013  
Naaja H. Nathanielsen

### **Apeqquteqaat aallaavigalugu nuna tamakkerlugu immikkut ittumik eqqagassanik saliinissamik suliniuteqarnissaq pillugu oqallisissiatut siunnersuut.**

(Inatsisartunut ilaasortat Gerhardt Petersen, Siverth K. Heilmann, Atassut)

Avatangiisit taakkualu minguitsuuteqqullugit qanoq iliortoqarsinnaanera oqallisigissallugit Inuit Ataqatigiit piareersimajuaannarpugut. Nalunngilarput akisussaaffiup ilaa kommuniniittoq, kisiannili tamanna uniffiginagu peqataaffigaluguli kommunit Namminersorlutillu Oqartussat kivitseqatigiillutik suleqatigiinnerulernissat iluassagaluarpog Inatsisartut Naalakkersuisullu sulissutigisinnaassappassuk.

Ukiuni kingulliunerusuni kommunit arlallit eqqagassanik immikkoortiterinermi nutaanik pitsanngorsaateqarlutillu eqqaaviit inuillu najugaqarfiisa salinneqarnissaat sulissutigeqqilersimavaat. Tamatuma kommunit missingersuutaanni tulleriissaarinermi sallernut ilaatinneqartarnera ilalernartorujussuuvoq. Tamatumami tulleriissaarinermi sallernut ilaatinneqarneranut pissutaaqataavoq aningaasaliiffigineqareerlunilu aallarereeraangat eqqagassanik immikkoortiterineq aningaasanik ilumut sipaarfiulluarsinnaasarmat.

Aamma Namminersorlutik Oqartussat ukiuni kingulliunerusuni suleriaqqissimapput. Naalakkersuisut siuliisa Europami Avatangiisit pillugit Sullissivik suleqatigilersimavaat ilaatigut eqqagassat pillugit meeqqanoortumik inuusuttunoortumillu filmillortitsinermik kinguneqartumik. Tamatuma saniatigut suleqatigiinnermut isumaqatigiissusiortoqarpoq eqqagassanik nakkutilliilluarnerulernissamik aammalu nunanut allanut nalunaarsuutitik paasissutissanillu paarlaasseqatigiittarnissamik qulakkeerinnittumik. Suleqatigiinnermut isumaqatigiissut taanna tigussaasunik kinguneqarsimanersoq aammalu tassunga kommunit ilanngullugit akuutinneqarnerisut Naalakkersuisunut apeqqutigerusupparput. Europami Avatangiisit pillugit Sullissiviup attaveqarfigisaasalu ilisimasaannik nunatta pissarsiaqarluarsinnaanera qularutissaanngilaq. Assersuutigalugu Sullissiviup sinniisaasa ilaasa isumaat malillugu imaalluarsinnaavoq eqqagassat ilaannik tunisinermigut Nunarput nuna tamakkerlugu suliniuteqarnermigut eqqagassalerinermit aningaasartuutissami ilaanik matussuseeratarsinnaasoq.

Eqqagassanik immikkut ittumik saliinissaq eqqartussagutsigu taava pisariaqartitsinerup ullumikkut qanoq annertutiginera pillugu nutaanik paasissutissinneqartariaqarpugut. Eqqagassalerineq pillugu periusissiatogaq aningaasatigut tulleriissaarinermi salliutitanut iluamik ikkunneqavinningitsoq suliarineqarnerata kingorna pisorpassuaqarnikuvoq. Pissusissamisuusaaq paasissutissat kingulliit ilanngullugit nuna tamakkerlugu pisariaqartitsinerup annertussusia, saliinissap qanoq akeqarnissaa, immikkoortiterinissap qanoq akeqarnissaa kiisalu siunissaq ungasinnerusoq isigalugu eqqagassalerineq pitsaanerulersinniarlugu suliniutinik nutaanik aallartitsinissaq qanoq akeqassanersut paasissallugu.

Aamma pisariaqassaaq kommunit Namminersorlutilluunniit Oqartussat akisussaaffigineeraat apeqqutaatinnagu nuna tamakkerlugu nammaqatigiilluni suliniuteqarnissap iluaqutissartarisinnaasa qulaajarneqarnissaat. Saviminikunik katersinissaq imminut akilersinnaassappat taava tamakku aalajangersimasumik annertussuseqartariaqassapput, assersuutigiinnarlugu. Imaassinnaavoq nunaqarfiit, illoqarfiit kommunilluunniit ataasiakkaat taama amerlatigisunik saviminikuuteqanngitsut, kisiannili nuna tamakkerlugu katersigaanni tamanna imminut akilersinnaanngusaaq. Aamma nunap suatungaaniinneq ukiullu qanoq ilinera pissutaallutik ukiuni arlalinni suliniartoqartariaqassaaq, tassami qaammatini aputeqanngiffiusuni imarorsimaffiusunilu aatsaat saliisoqarsinnaasarnera ilanngullugu aamma eqqarsaatigisariaqarmat.

Taamaammat Inuit Ataqtigiinnit Naalakkersuisut kaammattussavagut nuna tamakkerlugu immikkut ittumik saliinissamik pisariaqartitsineq qulaajaaffigalugulu ataatsimut kattullugu ingerlannissaanut suut periarfissaasinnaanersut nalilersoqqullugit. Aningaasaliinissamut periarfissaasinnaasut akisussaaffiillu qanoq agguataarnissaat kingusinnerusukkut tikissaqqaarparput.

Imaallaqunaqaarmi ajornartorsiutinik qaangiiniartilluni allaffissornerujussuaq aporfiunani annertoqqutaassasoq. Oqallilluarisi.